

25/03/2001

## Tujuh langkah bantu peniaga

DATUK Seri Dr Mahathir Mohamad memberi jaminan kerajaan akan melaksanakan tujuh langkah untuk membantu usahawan Bumiputera di Sabah.

Berucap merasmikan Kongres Ekonomi Bumiputera Sabah (KEBS) 2001 di sini semalam, Perdana Menteri berkata, langkah itu ialah:

- \* Memberi keutamaan kepada usahawan Bumiputera Sabah dari segi pemberian kontrak kerajaan dengan syarat tidak dialibabakan;

- \* Kerajaan akan membantu membangun dan mempertingkatkan program Masyarakat Perdagangan dan Perindustrian di Sabah, termasuk program keusahawanan khusus untuk wanita;

- \* Kementerian Pendidikan akan bekerjasama rapat dengan Kementerian Pembangunan Usahawan untuk menambah bilangan institusi melatih usahawan muda di Sabah;

- \* Institusi pengajian tinggi di Sabah seperti UMS dan UiTM akan mengadakan program latihan jangka pendek dan jangka panjang keusahawanan, khusus untuk pegawai kerajaan dan swasta yang akan bersara, bagi melatih dan membimbing mereka ke arah menjadi usahawan IKS;

- \* Kementerian Pembangunan Usahawan akan membuat kajian kemungkinan di bandar utama di Sabah bagi menjayakan projek 'Prosper' iaitu menambah Bumiputera dalam bidang runcit;

- \* Kementerian Luar Negeri, Kementerian Perdagangan Antarabangsa dan Industri, Kementerian Pembangunan Perindustrian Sabah akan memainkan peranan mereka secara agresif bagi mempercepatkan pembangunan Kawasan Pertumbuhan Asean Timur (BIMP-EAGA) untuk membuka pasaran baru untuk usahawan Bumiputera tempatan; dan

- \* Kerajaan akan memperluaskan konsep mentor/mentee, vendor/vendee, franciasor/francaisee di Sabah bagi membantu memperkembangkan lagi perniagaan Bumiputera dalam sektor pembuatan, pengeluaran peralatan elektrik dan elektronik, plastik, perabot, petroleum, tenaga dan telekomunikasi.

Dr Mahathir berharap langkah itu akan membantu membangunkan masyarakat perdagangan dan perindustrian di Sabah, sekali gus melahirkan golongan usahawan Bumiputera kelas menengah.

Ini bersesuaian dengan matlamat kerajaan mengimbangkan ekonomi Bumiputera dengan bukan Bumiputera, katanya.

Perdana Menteri juga berkata usahawan Bumiputera Sabah perlu mengorak langkah dengan pantas bagi mengejar tempoh waktu yang masih tertinggal, bangkit dan mempersiapkan diri menghadapi cabaran globalisasi.

(END)